



NEKA, JA ČU!

SAMOZASTUPANJEM DO SAMOSTALNOSTI

Dragi prijatelju,

Želim ti ispričati svoju priču. Želim da me upoznaš. Svi me zovu Džemo. Neko kaže: „Džemo voli džem.“, ali ja ne volim džem. Rodio sam se u Sarajevu. Sada imam 18 godina. Idem u „Srednju grafičku školu“, na Ilidži. Sada sam treći razred, smjer Fotografija. Puno volim ići u školu. Volim drugare, volim da učim. Idem sam u školu. Sve ja mogu sam. Mogu da idem u grad sam. Sestra me sačeka u gradu, i onda skupa idemo negdje. Mnogo sam sretan.


Kad završim školu možda ću upisati fakultet. Sestra kaže da je bolje da radim. Šta bi ti volio? Ja bih volio da radim. Mnogo sam sretan. Išao sam u „Centar Vladimir Nazor“. Imao sam i tamo drugare. Ljepše mi je u „Grafičkoj školi“. Tu imam puno drugova i drugarica. Svi me vole. Sada kupujem sam sebi užinu, sam idem kući. Mamu nazovem svaki put kad sjednem u bus. Da se ne brine. Hehe, mama ne voli što stalno slažem odjeću. Rekla je da će mi izbaciti sve stvari iz ormara, pa da imam stvarno šta raditi. Ne volim nered. Ja sam sebi biram odjeću. Vidio sam da se sada nose jakne s macom. Rekao sam sestri, našao sam sliku na internetu. Ona će sigurno kupiti, moja sestra mene voli. Ona je moja najljepša sestra. Ona vodi mene svukuda. Ona je išla sa mnom u školu da se upišem. Ali nije birala moj smjer. Ja sam izabrao da slikam. Volim da slikam. Dobio sam fotoaparat. Dobar fotoaparat. Koristi mi na praksi. Ponesem ga u školu i onda slikam njime. Kod kuće prebacimo slike na laptop, pa na usb i onda ponesem u školu da profesor ocijeni. Mnogo sam sretan. Znaš li da sam radio? Išao sam u firme i radio sam sa kolegama. Zaradio sam platu. To je bio jedan projekat. Kad počnem raditi, zaradit ću novac i želim sebi kupiti auto. Super je kad znaš voziti. Onda možeš svukuda ići. Ako želiš možemo skupa ići negdje. Ti i ja, zajedno. Prijatelji skupa idu svugdje.

Tvoj prijatelj Džemo.



NEKA, JA ĆU!

SAMAZASTUPANJEM DO SAMOSTALNOSTI



Džemal Karčić je rođen 18.07.1998. godine u Sarajevu. Ima brata blizanca i dvije starije sestre. Iako je 2003. godine donešen okvirni zakon o inkluzivnom obrazovanju, Džemalu nije omogućeno da pohađa redovnu osnovnu školu, zajedno sa svojim bratom. Zbog toga je završio specijalnu osnovnu školu „Centar Vladimir Nazor“. Po završetku osnovne škole, porodica nije dopustila da nastavi svoje školovanje u specijalnoj školi, jer specijalna škola nije poticajna za osobe s Down sindromom. Nakon toga Džemal je upisao redovnu srednju školu, u kojoj je doživio potpuni preobražaj. Džemal je sada samostalan mladić koji redovno učestvuje u svim aktivnostima sa svojim vršnjacima. Porodica mu je velika podrška, ali sada već on sam donosi svoje odluke. Njegova samostalnost je izazov za njega i porodicu. Na društvu je sada da prepozna njegov glas i pruži mu ruku podrške.



NEKA, JA ĆU!